

Sie yetz vmbfert inn allem standt
Ich vörcht das schiff kum nym zu landt
Sant Peters schyfflin ist im schwangk
Ich sorg gar vast den vndergangk
Sie wällen schlagen all sytt dran
Es würt vil sturm vnd plagen han
Gar wenig worheyt man yetz hört
Die heilig gschrifft würt vast verkört
Vnd ander vil yetz vß geleitt
Dann sie der munt der worheit seyt
Verzych mir recht wän ich hie trifft
Der endkrist sytzt im grossen schiff
Vnd hat sin bottschaft vß gesandt
Falscheit verkündt er / durch all landt
Falsch glouben / vnd vil falscher ler
Wachsen von tag zu tag ye mer
Dar zu / dünt drucker yetz gut stür
Wann man vil bücher würff inns für
Man brannt vil vnrecht / falsch dar inn
Vil trachten alleyn vff gewynn
Von aller erd sie bücher süchen
Der correctur etlich wenig rüchen
Vff groß beschiff vil yetz studyeren
Vil drucken / wenig corrigyeren
Sie lügen übel zu den sachen
So sie mennlin / vmb mennlin machen
Sie dünt inn selber schad / vnd schand
Mancher der druckt sich vß dem land /
Sie mag das schiff dann nym getragen
Sie müssen an den narren wagen
Das eyner tüg den andern jagen /

mit
lopin

